

四庫全書

集部

欽定四庫全書

集部

繼志齋集卷一
三

詳校官編修臣曹城

中書臣劉源溥覆勘

總校官知縣臣楊懋珩

校對官中書臣陸湘

騰錄監生臣陸潮愈

欽定四庫全書

集部六

繼志齋集

別集類五 明

提要

臣等謹案繼志齋集原目作十二卷明王紳撰紳字仲縉義烏人待制禕之仲子明史附見禕撰稱禕死時紳年十三事母兄敦孝友長博學受業於宋濂濂器之曰吾友不亡矣蜀獻王聘紳待以客禮紳啟王往雲南求父

遺骸不獲述滇南痛哭記以歸建文帝時用
薦召為國子博士預修太祖實錄獻大明鏡
歌鼓吹曲十二章卒於官王泌東朝記以為
成祖召入翰林編摩太祖實錄者誤也其集
殘缺失次僅存九卷而第一卷所載鏡歌即
已全佚其他斷簡缺文不一而足特以其為
名父之子又師承有自其文演述豐蔚不失
家法詩亦有陶韋風致無元季纖穠之習在

洪武建文之間尚可卓然成家雖一鱗片甲
要非凡格不以其缺佚棄之也乾隆四十六
年十二月恭校上

總纂官臣紀昀臣陸錫熊臣孫士毅

總校官臣陸費墀

繼志齋集原序

余嘗論先秦兩漢之文章所以為至者蓋其人皆豪岸魁壘有傑出之才而負超軼邁往之氣故其文章足稱其中之所有若屈原之沈鬱賈誼之閎通董仲舒之純茂司馬相如之瓌奇太史公班固之雄深雅贍皆絕出百代之上而王褒劉向揚子雲之流亦皆奇傑詭異卓然各自名其家後世雖有善作者亦莫或之過焉余以為其時雖由其近古然亦豈非其所蘊蓄之深而然耶

後之君子苟有志於文不可不蘄至於古欲蘄至於古必其才軼氣充而後可幾焉洪武三十一年秋余以薦被召來京師官于太學未幾而金華王君仲縉亦來為博士仲縉翰林待制子充之子也待制公當國初時與其同郡太史宋公景濂俱以文章名天下心常慕見其為人而未之能得也及與仲縉交始得其文而讀之為之歎息以為非今世之人所能及之也已而仲縉復自出其所為繼志齋集見其豐茂典則有追古作者之風

蓋能世其家之文者也。因竊歎夫世之為文章者，其才每不足，而其氣又有所不充，以故不能以幾於古之人。使能養其才而充其氣，博於取而深於積，則文雖不斲於古而自不能不至於古矣。今夫江河之渾浩流轉而蛟龍魚鼈百怪之所聚，山嶽之崇高深厚而虎豹犀象百獸之所駭愕者，以其積之厚而蓄之富也。昔者君之先待制公與太史宋公皆學問博洽，才氣超越，觀其於六藝百家之書，諸史百子之言，網羅搜索，無所遺漏而

又本之以詩書之要故其發為文章馳騁變化縱驟放
軼傑然追蹤先秦兩漢之間而不可以涯涘窮也君既
以世家之學而又嘗游於宋太史之門所聞者深而所
積者富言論意氣逸發橫出宜其有非人所能及者則
其才氣之所至不既深矣乎嗚呼可謂能不愧於待制
公矣惜其仕不大顯於時而遽賫志以沒也仲縉嘗欲
余為之序久而未之能復今仲縉不可作矣然朋友之
義不可以終泯也故於是書之永樂元年夏五月望日

翰林侍講承直郎兼修國史廬陵鄒緝叙

曩年余承乏國子助教首與博士仲縉王先生交先生
酷嗜於古選一字一句必煅煉而後出故其所作往往
高出倫輩流麗圓轉陶鑄乎韋柳之間晚唐諸子蓋不
數也然余奔走湖海三十年矣能詩者非一人知詩者
則槩乎其未見也若仲縉者所謂知詩者歟惜乎用不
滿其材年不稱其德觀此詩者不能不發邈焉寡儔之
歎也仲縉之子稔來京師執此帙求余一言故書此以

告天下之賞音者焉翰林侍讀學士天游道者錫麓王
達題

欽定四庫全書

繼志齋集卷一

明王紳撰

曲

擬大明鏡歌鼓吹曲十二首

闕

欽定四庫全書

典

續志齋集

欽定四庫全書



續志齋集





誕敷物阜民康舉手加額以祝我王王不自居曰予臣
之良其臣伊誰聿有壽考為國元僚是曰安老惟安
老公王躬是保匪義不陳匪德不導王曰予學汝其
輔之王曰予政汝其助之公拜稽首對揚王休人亦有
言無德不酬治化攸敷厥既有徵寵利弗居天道惡
盈懇懇有詞請命大廷天子曰俞嘉爾老成式休爾
政仍優爾祿匪曰爾私敷錫汝福大哉綸言降于九重
王曰上命予敢弗從乃錫安車以奉其行乃錫華宴

以娛其情扶老歡迎出入其承為國之禎為士之榮
公曰是恩千載奇逢受寵若驚心益忡忡伊昔有聖志
在明農予豈若儔適諧其衷 岷山峨峨江水沉沉公
有嘉猷簡在王心公有善政播在德音我懷若人無古
無今 右明農九章章八句

五言古體詩

上巳日迎駕宿新都寶光寺

東風扇微和旭日絢陽春晨興秣我馬駕言出城闌矯

首京華道遙遙望清塵先驅曾未至眈眈徒勞神解鞍
憩古剎息慮澄吾真野人好辭色日夕羅盤飧佳節獲
良會慨羨誠難頻行當盡一醉鼓腹歌君恩

敬和中秋對月睿製

天高秋正中顥氣澄太虛素娥散清彩皎皎臨寰區惟
時明哲王恭默萬慮無異香浮寶鴨淨影印玉除心遠
景由寂神清情自娛至化基二南令譽騰九衢德尊意
彌下出入從師虞聖道本宏遠堯舜猶病諸願言思太

康益進無逸圖

過陸宣公墓

我我忠州山隱隱哲人墓寒烟鎖銘碑落日照封樹緬
惟貞元間唐室失其馭偏仄梁洋行間關奉天駐熊羆
紛播遷小大懷憂懼不有撥亂才蒼生孰依據維公王
佐資極力殫衷懷回天挽日月朶頤揮衆侮相業雖未
終功名亦朝露左遷固未辜茲焉豈其所至今讀遺事
令人淚如雨我行全蜀間舟經塚下路風順帆腹飽日

入川光暮扳躋不可得
躑躅頻延佇艤棹山月生
開蓬展中慕

謁余忠宣公廟

昔在元祚去四海遭亂離
羣雄互驅逐戎馬縱橫馳
降城販國者比比忘忸怩
坐令疆宇蹙百二山河隳
桓桓忠宣公耿耿匡濟資
蚤負經綸具晚鎮舒江湄
七年握兵符裒集多義師
控禦旣云備撫輯亦已綏
奈何荆楚間闕

欽定四庫全書

卷一

去住心忡忡江花擁層浪柳絮舞和風觀物易感傷未
別思重逢執手雙溪上相看澹無容願言善自愛冀爾
振吾宗

題杏林圖

東風扇微和萬木敷芳芬嘉林有名果不與凡植羣伊
花炫明麗厥核存至仁惟昔有仙子志在甦罷民年深
功已著植之滿比鄰至今千載下藹藹垂令聞卓哉壽
易彥文質何彬彬種德如種杏擇術非為貧存心惟愛

物托此康斯人不聞聖有訓作善福可臻願言勉自強
往軌良可遵

中秋夜坐留別鄒公瑾孟子彞

皎皎今夜月中天溜清光嬋娟絕纖翳彩魄仍飛揚憐
我二三友夙昔遙相望茲夕復何夕列坐開壺觴情真
任疎散醴薄味趣長朋簪喜已盡謂言樂未央奈此簡
書逼去住心惶惶浩歌成激烈仰視參與商會合自有
期毋為重悲傷雲山千萬重明發遵周行迹遠心在邇

矯首何時忘

簡鄭叔貞四十二韻

結交匪無人知己貴有適十年走東西浩懷久無得中
歲友鄭子誠哉我三益文采絢鸞鳳才華炫金璧譬若
雲臺將折衝懾強敵叱咤驚鬼神人馬皆辟易又若鄧
林材挺出樗與櫟蔚為棟樑望庸豎所共識器大不小
成材良遠繩墨物理古則然子實甘蓬蓽迢遞天台山
回首關河隔旅食困鹽虀久作山南客為言從師游擔

登來卒業阿師正學公長才駕濂洛兒童推世賢朝野
稱文伯蹇予在弱冠共寓蘿山宅雖號同門生實藉師
資德叩道辱弦應問疑承縷析乍別書累篇同處日共
食契誼等弟昆交情固膠漆一自事分離十載關良覲
重逢錦水濱握手道夙昔雲萍摠心知顧我眼獨碧惟
子蚤及門器業尤英特鑽瞻久已悟升堂仍入室董薛
未足倫游夏庶其匹賢王雅樂道醴筵日宏設羨子富
文辭諏諮動移刻屢續梁園賦每前賈生席緇衣敝復

為白駒去還繫恩禮實已隆負荷成感激念我自遠歸
神疲肢體瘠慰藉盡衷曲周旋竟晨夕維時秋正高商
飈怯締綌籬菊吐芳華鮮鮮鬪黃白呼兒具雞黍耶筒
筩釀秫情真味自長道合趣何極盍簪人所樂況爾同
師澤萬里獲良晤忻忻宜無數聖轍豈難追行之在不
息但願長相親永言共鞭辟

題松雪軒

鬱鬱蒼蚪形孤根盤厚土皎皎白羽姿遠自雲端下

音叶

戶氣味本不侔忽爾相依附清白人共嘉會合天所與
伊誰構軒居對之有佳趣風號龍虎吟歲晏珠玉聚願
言同此心貞素以相處

思親堂

烏鳥啼北林白雲度東嶺慨慷游子懷感物清夜永雙
親七十餘黃髮颯盈頂一從走東西三年睽定省纖纖
寸草心遙遙萬里迥宦游豈不嘉衷情安可屏陟屺復
陟岵跂足且延頸眴睐目生花淚下急如綆高堂扁思

親著此情耿耿何時奉周旋允言遂深幸

病中述懷十首

人身配兩儀至和乃無愆運行一差忒百疾從茲纏
智人善保養調攝歸本然曰予昧斯理情慾不自宣
內感仍外傷水火相凝煎形神幾已離榮衛失其源
匪藉湯劑勲胡能苟偷安誓將更生日保身如臨淵
上以奉遺體下以全天年

負病已逾月今晨覺少康稍興臨古鏡顏顏忽半蒼
灼

彼東籬菊依依傲寒霜雖然質柔弱晚節猶含芳此身
胡不如撫已成慨慷人生匪金石盛衰固其常但得保
其真榮悴非所傷爐烟颺微熏簷花散餘馥身閒心自
清病可神始足矯首對金門怡情陶玉燭

至人澹無為懲忿仍窒慾斯民囿泰和熙熙臻百福微
臣負末藝浮辭厭人目每承恩寵加清光日回矚蜂蟻
識天倫葵藿傾朝旭徒有眷眷心時效華封祝

端坐一室內默參玄化機玉宇正寥廓金飈亦淒其寒

暑互來逞晨興聿授衣人生百年中諒非金石姿乃欲
圖不朽弗修竟何為齊侯馬千駟顏子恒抱飢孰知千
載後嗷嗷紛是非

西風從何來遠遯庭葉至飄飄颯有聲來向書牕墜景
物易轉遷時序忽已異羈客念故鄉中夜不成寐仰睇
河漢明俯聞鴻鴈唳翩然逸興舉恨無凌風翅

去古日已遠淳風日以漓人情善誕幻去就浮雲馳彼
哉儉儉子出沒神鬼奇炎涼隨勢附朱粉從心施一朝

冥機至反成拙與癡於皇賦明命顧諟常在新不聞聖
有訓居易以俟之慇懃謝天君為我慎操持

靈龜本多壽乃為人所戕蜉蝣最微弱朝夕寄存亡修
短歸大化疇其較彭殤君子貴修持夕惕以自強毋為
累形役擾擾徒敝傷金張極盛麗回首如燭光黃憲苦
清修人以亞聖方富貴果何物當圖身後芳

伊尹畊莘野志在康斯民孔明卧隆中所懷務經綸玄
造生賢聖拯彼愚與昏觀其立勲業萬世光炳燬伊人

久已逝斯道幸未湮疇能繼其踵後來寂無聞但見夸毗子恬然忘本真捷負才慧區區周自身要顯患得失草莽憂賤貧胡不徇所務成功追古人

玄冥一司令萬植皆歸根惟彼籬下草荻葉自芸芸洪造匪有私天意含至仁故茲肅殺日生意猶斯存達人悟玄妙體物思脩身豈謂造次頃敢使德不純卓哉無極翁襟懷盎陽春庭草故不除於以觀天真

倘徉衡門裏積疢頗以安藥石有時親塵俗不我干雖

忻神慮得且畏時序遷扶僂挾黃卷幸見孔與顏沉吟
北牕下高睨太古前曠懷隘宇宙浩氣凌雲烟何以解
蘊抱奈此酒量慳持觴縱不飲對之亦陶然

南行道中述懷二首

歲晏霜雪零驅車卽長路雲山杳茫茫舉趾將焉赴迢
迢滇南道惻惻終身慕志在忘險夷情深畧憂懼風號
林聲淒日落嵐光暮哀猿抱子啼慈烏返初哺物理古
則然我生亦何故撫景增愴悽仰天淚如注

滇雲接馬首，棘道盤羊腸。感慨情思惡，登頓肢體傷。平生終天恨，今日許予償。但得情事中，豈憚關山長。豺獫知報本，春秋事烝嘗。惟人有天性，肯愧虎與狼。哀哀王裒氏，久廢蓼莪章。我生千載下，衷情允相望。

贈楊宗彞

出處非可謀，道義貴有得。疇能盡真修，油油遂清適。卓哉銀塘翁，飄然髮垂白。祿食二十年，中外遍敷歷。宦遊豈不嘉，奈此崦嵫逼。況有父子情，久矣萬里隔。陳辭解

官綬徜徉躡泉石遊魚思深困倦鳥戢飛翼理得趣自
真俯仰契玄蹟孰謂天杳冥惠迪終承吉

題坦然齋

去古日以遠機巧日以生紛紛任鉤鉅無復存至誠孰
知玄妙理所貴在坦平美人領斯趣百慮帖然凝閉門
謝往來絕口輕縱橫但忻情意得不識辱與榮浮雲去
復還飄飄傍幽局好月不待招清夜當戶明幸有一尊
酒聊以娛吾情悠悠身外事居易復何營

魚梁坡

我登魚梁坡維時日初未陟降直雲端指顧彌空際嵐
光接杳冥林姿積蒼翠行行層復層已極巍峩勢恍疑
身近天未覺足行地俯見千仞溝惕惕增予悸僕夫相
告言力乏須少憩輟步心漸平徘徊得深意

夜郎驛

自行播州境人事覺稍優野闢停傳飾俗朴居民稠迢
迢夜郎道熙熙左衽儔駛舌口中語咿嚶道邊謳下馬

樂明守上馬洽皇猷詎云蠻貊陋直與華夏侔伊昔謫
仙子疋馬曾茲遊懷人劇感慨中夜翻百憂

象鼻嶺

晨興陟脩途危險誠已極舉步脛抵腦汚泥深沒膝林
箐凝清寒夔魅啼白日夷獠恃阻艱狙伺伏深密鳥言
人弗諳毒矢應弦急聚散呼嘯間寇敍窮奸譎嗟我孱
弱資區區守蓬萊胡為事遙邁形疲仍股慄蠻烟暗冥
冥瘴雨低濕濕勛心所甘情事何時畢

盤江

盤江瘴癘地氣候誠不平鄰壤盛雨雪秋冬劇嚴凝惟
茲十里內炎埃障脩程山川本不異咫尺殊陰晴戚戚
巡候吏奄奄謫戍兵飢虛迫憂患羸弱存敝形來者不
滿歲死者如傳更當今際隆盛治化稱休貞疇其任變
理坐使同清明

除夜

世俗重除節處處羅盃盤謂言歲作勞及茲聊與歡我

行蠻貊中其風亦復然俗樂競吹彈土缶陳腥羶歌呼
相聚會咿嘍劇喧闐見之感予懷中夜百憂煎豈不有
至親迢遞隔山川相思不相見離恨終長年撫時重歎
息掩袂嗟潛焉

遊大佛寺

舟行困局促登高肆舒敞極目縱遐觀騁心獲幽賞
我金仙容屹立高千丈巔岼自天成靈光騰潏潏晨鐘
發幽籟毛骨生蕭爽黃花送晚芳翠竹侵寒幌坐探西

來意勞我重俯仰

種德堂為程克新作

於皇降明德惟人共稟之培養弗自戕庶可全良彛瞻
彼黍與禾芄芄秀東菑苟非種藝力根本從何施美人
達玄妙立志亦已奇謂欲樹陰功衆技莫若醫軒岐幸
有法盧扁良可師持此濟吾術存心恒在茲駸駸歲月
邁浩浩陰陽移願言勿終怠勉哉圖務滋

贈皇甫斌

皎皎丹鳳雛羽翮初未長爛馬九苞文綯綯流晶光乘
風出丹穴意欲習翱翔斂威備容儀來憩渝山陽依棲
既得所修養惟有方但能忘青雲期爾鳴朝陽

題山水圖

澄江波粼粼弱柳枝裊裊結廬在繁陰隨時事漁釣紫
芝無續歌陽春有餘調縱浪烟波中清風滿孤棹

題翠微深處為傑斗南上人作

心閒境自清境清神愈適是以曠達姿遐蹤寄幽僻方

外有名區峯巒翠如積其中窅且冥遼遼塵俗隔高人
海上來閻浮遍遊歷蚤歲悟三空冥栖縛禪寂杖藜入
空青斗室生虛白人我久已忘門羅點頭石雨過寒襲
人雲收山在席孰謂西土遙於焉真淨域

題於仲寬畊樂軒

道在情可娛業安心足適自昔超邁姿栖栖依稼穡伊
人負幽趣蚤歲任民職一朝解組綬萬里來蠻貊世慮
幸已忘躬畊期戮力謀生効子真遺安慕龐德寵辱了

不知寒暑任更易但願歲功熙永言遂怡懌

黑松林

曲靖有松林逶迤百餘里蒼蒼無異色鬱鬱有佳致靈
籟天上来怒濤樾間起赫日任行空淒飈常襲體慨彼
貞素姿一一皆有以大足任棟梁小可就規矩無能致
通都寂寞徒自棄邱壑多遺材達路少廢枳斯理諒

闕

欽定四庫全書

卷一

欽定四庫全書

卷一

欽定四庫全書



卷一

仙子栖冥寄邱壑其間窅且幽豈無托寥廓幾欲相追
尋又恐其蹤邈

龍頂先春

洪造本無私大鈞同一圃如何龍頂山節氣分先後崇
岡鸞鳳翔複嶺龍蛇走和叔之所鍾春陽每超湊疎疎
隴梅新纖纖澗草秀化工妙且神此理詎難究至和氣
自殷何必拘常候

東樓晚照

潼川之東山上有古書樓相傳唐趙蕤於中註春秋伊
人久已化其迹尚可求落日下平陸登眺光未收餘輝
射崇薨殘影下簷頭徒倚對西山爽氣顥若浮撫今重
懷古行歌且歸休

張杞舞草

化工賦羣品動植各有彛苟為失其性猜詭人共疑古
潼有異草枝葉何歲蕤倬約解人意婉媚存妓姿無風
自傾舞俯仰如有知惜哉長路傍甘為牧豎欺我欲植

其根怪物世所蚩

北巖琴泉

北巖有寒泉其音寂且清譬如焦尾琴空中調徽聲入
耳自歷歷臨風常泠泠可以解慍抱可以娛心情蕭然
疏以越絕響聞青冥寥寥太古意誰復於斯徵幾欲策
藜杖臨之濯塵纓

涪江夜調

涪江勢若奔晝夜歸朝宗嶙峋灘上石屹立當其衝激

之成天籟清響振秋空
午夜月華明鸞鳳遙相逢
穆穆下和鳴徽音中商宮
伯牙有餘思子期渺遺蹤
疇能領其趣此調高無窮

南山暮雨

薄暮嵐光浮林巒
倏蒙翳日晷未下山
雨脚已垂地沉沉
猿鶴吟勃勃蛟龍氣
雷轟岩石裂瀑瀉銀河注
四顧毛髮張惕惕
增予畏須臾天威收
風月浩無際萬象儼
森羅太空本何意

鶴林春色

鶴林美風景凜凜歲寒色
沉茲陽和交蒼翠鬱如積
鮮素羽禽皜皜雪霜翼
逐時自生成熙熙性舒適
勝地布黃金奇葩攢白壁
僧舍鎖烟霞梵宮炫黃碧
回顧花柳區徒能為形役

堯率烟霞

潼川古招提久矣擅名勝
烟霞翠作堆直據烟霞頂
蒼蒼異人世漠漠通仙境
下視閭浮間可與蔚藍並
老僧

不出戶蒲團坐幽靜冥滓天地開蒼茫歲月永禪悅不
知時賴有晨鐘省

五仙

趙黈

高人抱沖志不與凡士同譬之凌霄鶴雞鶩安能從邈
哉趙大賓錦綉盤心胷百家盡研究探索歸會通業成
事肥遯不肯干王公竟作赤松遊千載存徽風

文塚

卓哉劉拾遺上書諫其君逆鱗固難批忠憤須具陳書
成君不聽從此終沉淪至今潼川境有塚瘞其文寒烟
被宿草西風送浮雲吁嗟身後名過者為酸辛

保和

唐有易玄子吏隱已多年由來積陰德竟爾成神仙蕭
闕

題思詒齋

溫溫經尺璧寶之無不至盈盈一杯水捧之惟恐墜人
生七尺軀負抱良已貴欲思淑厥身當須奉名義五陵

豪少年昂昂多意氣不圖顯揚謀聲譽只如寄栖栖陋
巷人簞瓢或弗繼動履不忘親令名日昭晰置器且求
安保身豈無計載歌思詒詩令人發長喟

灌陽懷古

灌陽翳頽城清湍夾荒廛居民數十家烟火何蕭然停
驂問民俗共言苦輸邊捶扑無完膚逋租動累千憶昔
吾遠祖所至人共憐曾來守是邦煩苛隨時蠲既除威
茂運且息官貸錢惠愛民不忘姓字人能傳茲來訪遺

迹往苒三百年仰探撫字心皓雪凝山顛

奉陪安老致政先生游南莊作

溪迴村落虛山迴川原曠草堂工苟完嘉疇君所貺是
時收穫初聯騎遙相訪東郊騁遐觀西隣薦新釀酬酢
衡門間徘徊土橋上風俗粟里侔景物輞川抗行辭玉
筍班來作山中相豈無戀闕心亦有明農望進退荷恩
榮睠焉期夙尚

喜聞胡伯尚至而作

十年金石交千里雲山隔秋空鴈冥冥夜雨情脉脉平
生蓬革資區區二三策疇能了此心非子將誰白好音
從何來雲舉雙鳬翮眷言遂情素豁若干金獲

和嘉猷林先生韻

膏車屈岐路控勒將何之周道固匪遙疇能適所思曠
懷隘千古滿腹撐羣疑多子藹高誼抗論豁我眉
沉吟北窻下不見知心人牆角有寒梅冰姿出塵氛對
之有佳趣侑以酒滿尊嘯傲萬物表皓月生嶙峋

我久客西川子來自東吳成此萬里會幸得一尺鱸苦
乏尊中物旋解腰間魚對面不為樂別後徒臧書

懷人夜無寐坐聽寒漏息斜月下梧桐餘輝欺曙色斯
文豈無屬遺緒會有適眷言重自珍相期固金石

昇仙橋別林嘉猷二首

端居闌闕中有耳若無聞匪曰病聾聵至道莫予陳有
嫩古君子來自東海濱丰姿挺梧竹卓見超嶙峋高論
兆睽究浩懷雲夢吞連床吐深情翦燭談斯文噲噲孤

鳳凰瑩瑩真麒麟可致不可羈我心尚伊人

身度昇仙橋言送凌雲客駿馬簇游龍華車集芳陌長
揖臨路岐相看情脉脉憶昔題柱人才華富籌策風雲
相際會聲名隨烜赫顯揚丈夫事尚恨所志窄慨想有
深情非子吾誰白

別王仲修

闕

續志齋集卷一

欽定四庫全書

繼志齋集卷二

明王紳撰

五言古體詩

夜坐呈正學方先生

關



簷傍流水柳巷夾荒堤燈火川上明日落行人稀勝遊
固足樂荒亡古所譏

題菜

紛紛桃與李
默默自成蹊
繁花一消歇
寂寞無人知
孰若春園蔬
生長在中畦
至味存澹泊
疎葉發華滋
彼哉膏粱子
但慕羶與肥
不得此中趣
百事安能為

原希命飲分韻得園字

才庸困官職
志僻厭煩喧
今日適公暇
遂爾叩衡門
之子喜我至
日夕羅盤飧
江鱗入初饌
檐花照清尊
酒酣句益豪情
投語自溫顧
此二三友
夙昔道義存
及此成

嘉會歡樂難具論
明河橫碧落疎鐸響城垣
長嘯靈籟發皓月臨東園

留宋子夷夜飲分韻得重字

浮雲翳原隰朔風號仲冬
故人百里來握手一笑同
豈惟會晤難感此契誼濃
情真飲逾量不知尊缶空
人生在行樂無為苦匆匆
明日灌陽道雲山千萬重

送鄒公瑾赴京

滔滔大江水晝夜流無窮
飄飄太空雲來往何定蹤
雲

出須致雨水流擬朝宗雲水亦何心物理自爾同嫩人
事真修業成譽彌隆譬彼瑚與璉合致清廟庸又若丹
穴雛飛鳴際時雍今晨錦江上征帆飽西風執手不忍
別離憂益忡忡陽回梅吐萼雪消山露峰盛年幸未艾
令德須更崇

養銳在西蜀發軔從古渝慷慨抱長策奮振登雲衢飽
學期致用負才任所需丈夫弧矢志母為事區區冬深
江水落灩澦成坦途孤舟下如駛指日瞻皇都皇都英

彥藪列肆羅璫璵廟堂重稷契閭巷訶唐虞年來益求
賢行矣勿躊躇但當勵崇節善此千金軀

送史行可先生赴考

宦遊三十年卑顯遍數厯起家自東南祿食諳西北豈
無桃與李繁華隨候易惟彼後凋姿不改歲寒色保身
匪無計存心任坦直儉約苦清修謹厚效玄默自我客
西川邂逅遂良覲歡然竟忘年傾倒譚在昔慨想冰雪
心浩懷風雨夕亦欲長相親栖栖縛形役竭來錦江上

重逢懷抱釋既續梁園賦每前賈生席啟沃協審情諏
咨動移刻如何歲云暮束裝上京國贊畫謀猷多用夏
變夷貊政成與計偕奈此簡書逼雲橫棧道高雪擁劒
門窄萬里足翱翔乘風搏巨翼

送胡仲長分韻得游字

當今逢掖徒正學稱冕旒及門二三子孰爲夏與游英
英古榮彥文彩珊瑚鉤又若九苞雛不與雞鶩儔江城
歲華晏朔風襲重裘陟岵復陟屺淒然翻百憂扣門來

別我執袂不可留相送出崇墉攬轡心悠悠烏鳥啼遠
林白雲被荒丘物情固所感正學宜繼修

題周子良梅谷

季冬天氣肅百卉具已腓靈根先太極侵寒自芳菲蹇
蹇鐵石操皎皎冰雪姿疎花散空谷歲晚疇能知幽人
謝紛華託以同襟期影斜蒼澗側香度黃昏時邈哉逋
仙子悵焉起遐思

同袁公弼飲吳邦輔家

初陽布輕燠羣卉擢新芳良辰屬嘉會煩囂滌中腸慨
我二三友出處各異方遂合孰使然萃此君子堂珠璣
溢篇帙肴核間壺觴情真飲逾量話洽心兩忘東隣陳
綺筵珍羞燦輝光西舍列吳謳徽聲繞高梁豈知侈心
蕩歡樂殊易央何如文字飲澹泊趣味長

題畫菜

畦蔬有嘉種更藉雨露恩綠葉發華滋足可供盤飧伊
誰慕清修志欲茹其根於焉寫幽貞宛宛生意存

夏日懷敬直先生

天氣屬清和幽齋淨於水端居仰聖明俯探玄化理浮
雲馳遠郊重陰陰書几好鳥弄佳音閑花發奇卉蕭散
有餘清煩襟蕩塵滓比隣有幽人相去不尺咫論心膠
在漆談道宮協徵信宿不相逢離憂騁如駛大音本希
聲高懷曠知已斯文幸可徵殷勤望之子

送虞升善回京

江梅遞清馨山雪照行色把酒錦江濱言送青雲客之

子名賢孫早登君子門淵源既有自德業難具論竭來
奉朝命萬里行西蜀簡閱厯邊城計偕屢案牘今晨來
告別握手不忍分匪為話別難亦欲致殷勤丈夫平生
學惟存忠與孝二者百行源芳名簡編照

夏夜同劉仲美讀正學方先生文

良宵塵事寂好月升前楹庭卉薦芳細松風入懷清故
人百里來一見雙眼明呼童具雞黍濁醪聊對傾山南
文章伯雄論神鬼驚一自鈞天奏屏縮嘈嘶鳴挑燈謾

披閱口誦兼手謄煩襟頓蠲滌鄙悵無由生信知斯文
妙能起薄俗情酒酣共忻賞疑義釋春冰

夜坐書懷簡仲美

弱齡志問學屏慮息衆營道遠力駕下潦倒終無成
摛辭希往哲談經對諸生谷空靈籟應候至悲蟲鳴感物
成內省俯仰慚愧并故人適遠至使我懷抱傾薰風起
脩竹微雨洒疎櫺悠然領斯趣新暑隨時清步屨頽簷
下笑談到深更豈徒今夕樂庶得千古情

贈夏醫士

灌陽有佳士迴與凡俗異擇術非自謀存心在濟利袖
攜長生訣日啟軒岐祕表裏察陰陽刀圭起痼滯采苓
岷山顛洗術灌水滋生理不妄營存畊有餘地橘井秋
香清杏林春色媚往軌倘可逐高風願君繼

懷鄭叔度二首

人生水上萍往來無定根會合既難常有懷嘗苦辛高
人美風裁毓質孝義門溫溫富文學籍籍佳弟昆攜辭

擷春葩抗志凌秋旻憶忝籍湜好切磋義彌惇夜踏麟
溪月曉卧蘿山雲年來事分攜欲見邈無因長風蕩天
末流水行遠津吳蜀隔萬里矯首嗟離羣

塵事汨清興擾擾無已時偶茲休沐日暢焉起遐思骨
肉日以遠故舊日已稀為學若望洋年華去如馳開歲
倏四十頗覺前事非玄駿已半改芳顏亦就頹歎此時
序邁青春不再來日夕秉明燭酌我杯中醪呼兒具紙
筆細寫停雲詩

出郭言懷

經時不出郭出郭多佳趣
按轡故徐行庶以滌吾慮
農唱發前村人家隱深樹
溪流縈復折揭涉不辭屢
忽驚白鷺起遠向青山去
人生貴佳適是非安足預
即景動遐思故山渺何處

讀李御史文藁

枯蒼鬱差莪上與浮雲齊
秀氣之所鍾每生起卓姿
嫩人抱奇才造就從碩師
新詩追少陵雄文逐昌黎
鳳鳥

鳴高岡祥物由來稀幸茲文明世拭目一見之渴吻沃
瓊液虛腹餐藟芝豈惟過所望體腋生光輝蜀道走驄
馬夷民瞻繡衣邊情重當恤願言謹諏咨

病中述懷

抱疾頽檐下嗒然徒自傷飢或恣所食熱或解我裳但
適一時快豈顧今日殃至人謹天和動息皆有常保疾
如保嬰肯使邪沴戕嗟予昧所守從欲不知防淹淹百
病侵坐使鬚髮蒼一身自弗理欲恃藥石良苟居廟堂

上曷致斯民康

別成都諸友

竊祿居成都妨賢心獨恥徵書天上来詔許歸帝里倉
皇不俟駕惕惕戒行李雖無懷土情寧不念知己雄藩
衆朋舊一一皆佳士出餞錦江湄芳情藹如醴話言始
云洽吾事適有指方舟解維去咫尺川原異雲山杳茫
茫契闊慨今始相期豈無言令德在惇美

送鄭叔貞從駕巡邊三首

時雨沐芳甸林木薦南薰賢王肅命駕廣道先清塵奔
走給衆役呵護勞百神山川本自嘉徽塞須遠巡前驅
盡褒鄂旁侍皆白申豈惟耀威武亦欲昭至仁馳驅匪
云邈屬車無停輪遙遙盼紅雲擬候廣漢濱

鸞輿屬巡幸奔走紛俊乂川光照征袍隰雲擁飛騎鄭
子山澤癯遠自東海至許令沐清光執筆同近侍原野
民物饒夷貊風俗異遊豫昭王度紀述擅才氣寸善且
不遺至德在詳記洗耳錦江濱好音為頻寄

子長好遠遊為文時出奇子美遍涉歷窮達皆寓詩斯
文千載事藉此清淑資羨子有深緣遭遇天人知薰陶
飫令德遊覽逢盛時坐使補袞手抽出獨繭絲蹇予類
斥鷃卑卑守茅茨安得凌風翼與之相追隨

初度

時序倏云邁隙駒快先馳四十在眼前回首百事非學
術無寸進宦業亦何卑齒牙半衰豁種髮或染絲長恐
成濩落老大無補裨朝夕惕以厲尚恨鷲且疲晨興對

東旻再拜雙淚滋誓言毋愧忤樹德以爲期

簡實即中法師

步屨西郭門炎埃集締服夜投古招提共假禪房宿上人海上來清姿揭梧竹玄通道眼明悟徹機鋒速內典既已充外學亦何足宗門二三老延頸深期屬交誼薄烟雲贈言藹珠玉一見雙眼青相知恨不夙問德識淵源論文究衷曲燈花吐清輝庭草薦新馥未結三生緣澹然念超俗

問題

以下原関

難常嘉會良足記

簡鄭叔貞

前年抵西川今年發東越萬里豈不遙崎嶇勞跋涉關
河足游覽襟懷益軒豁雄文竟何如我目日以刮當宁
久虛懷求賢若飢渴蜀道諒已諳重來馬蹄滑壯游當
及時無為待華髮擬踏浣溪雲共看岷峨月

嘉猷以詩言志故亦本予志以答之

憶昔盍簪日念子思有為投筆長歎息慨然賦新詩鴻

鶴千里志浩浩不可羈況當盛明世翱翔政其時自慙
鷦鷯質栖栖戀茅茨豈不欲高邁明命那忍違錦江春
色暮和風入羅衣援瑟鼓復作尚嘆知音稀

送正學方先生

交久情自篤道同誼彌深豈曰足可取偶契賢哲心樗
櫟產深谷莫為斤斧尋誤蒙匠石睨價比南州金鈞天
絕遺響竽籟競哇淫孰識爨下質乃是稀世音物理固
則然天命良足詎握手岐路側慨然發長吟

和鄒公瑾留別二首

新陽被芳甸輕暑却餘寒
時序有代謝形役何足歎
縱浪比雲萍總圓大化間
苟能篤情好意氣增巍山
憶在渝水側握手成交歡
乍離忽復合嗜好同醎酸
幾回憑尺素寫此鐵石肝
千里固匪遙心在會豈難

有美蓬萊侶玉質何溫其瓊琚
以為佩雲霞以為衣翩然駕白鶴
悵望將焉之岷山奇復高渝水清
且漪相望不咫尺何由共襟期
佳音比金玉遺我可解頤

舟次瞿塘

江空風力邁秋氣日已肅扁舟事東邁夜泊瞿塘宿先
師太史公文章燦珠玉孤忠日月明素行金石篤共談
遭逢盛詎云基謗讟豈特黔我行終成沅湘逐孤墳寓
江濱培然欺豎牧宿草被荒阡寒烟迷拱木絮酒不忍
奠拈辭詎堪讀矯首睇太蒼何以盡哀曲吾皇天地仁
德澤沛膏沐朽骨倘蒙恩當期不遠復

入峽

世傳三峽險吾身適屢往蕩舟趨回流驚濤漾輕槳巔
峯開復合青天細如掌浪急先期程谷空荅漁響回顧
上瀨人吾行若平壤日夕下夷陵祝酒相忻賞

送鼎上人還鄉

青原有名緇戒行極嚴具一葦航大江飄飄隨所寓十
月天雨霜木落林姿露翩然逸興發長歌賦歸去杖錫
輕波濤袈裟入烟霧月照祇樹西相思渺何處

題終養堂

散步出平陸烏鳥啼北林矯首睇寥廓白雲飛遠岑感
物易傷懷惕惕孝子心嚴親不待養歲月何駸駸幸有
堂上母亦已桑榆侵奉觴介眉壽春酒隨候斟亦有忘
憂草樹之高堂陰謂山固非高謂海亦何深但願遂終
養仰止損與參

題去思亭卷

民情本無事帖然靜於水順性以道之自能臻至理縱
觀古循吏視民如赤子既去人見思芳名藹青史籍籍

金郡侯存心多豈弟持節鎮全閩剖符當帝里既敷延
壽化且洽信臣治仁政方下孚宿瘼已如洗胡為北堂
萱夜逐秋霜萎蓼莪遽興哀歸心疾於矢攀轅竟何為
卧轍諒難止載歌甘棠詩庶以著侯美

寄宗思睿朱子建

虛名被洪恩一官授國博才華非所任廩秩殊不薄抱
經適玄妙志道忘澹泊朝對鍾阜雲夜聽石城柝懷人
千里外惻然歎離索豈無停雲詩欲寫情思惡英英默

齋翁閱論抗寥廓矯矯丹溪英雄文擅述作參商忽三載高誼諒如昨何時華川湄從容手重握

寄昂伏菴禪師

弱齡厭喧囂雅志尚玄默胡為中年來奔走倦形役一自服官箴出入不遑息雞鳴走風雨旅食困朝夕山中有高人端居縛禪寂寞觀萬物表幽情寓泉石道機既云熟真源諒應滌不為塵鞅羈但恐坐詩癖話別華川湄寒暑忽屢易觀想三生緣寧念紅塵客

送睢州陳知州之任

歲晏霜雪零揚帆入烟霧赤手綰銅章遠向睢州去赫
赫張許忠耿耿晏劉譽人遠跡可尋莫嘆來何暮

東郭草堂為姑蘇王仲遠賦

草堂三兩間去郭十里餘門栽陶令柳架插鄴侯書漁
樵足生計琴樽供晚娛未知杜陵宅風致更何如

稽古齋為晏彥文助教賦

麟原有幽齋蕭然僅環堵疇其托真栖於焉號稽古鴻

荒世已遠義軒邈難覩至治論唐虞斯道集鄒魯人文
既已開脉脉垂微緒不有博洽功精妙何能舉若人元
獻裔家學紹伊祖搜羅極玄蹟註述昭天序韋編窮歲
月青燈坐風雨但知卷中趣寧辭我心苦尚友惟聖賢
騁懷隘寰宇坐此固非癖靈臺澹容與

寄叔盛叔雍叔叙諸姪

余宗本名門厯年逾五百家世篤忠貞奕葉傳清白大
父常山公舉代稱儒宗厥生子三人衍慶流無窮伯也

實迺祖季也為叔父出處雖不齊辛勤植門戶仲即我
嚴君力學貫天人斯文紹前哲盛名天下聞余生蹇且
劣髫年失怙恃蓼莪重興哀風木感劬瘁間關四十載
無術周其身黽勉緝先業縷髮懸千鈞竭來被虛名萬
里宦川蜀一官未云滿又竊太學祿太學賢俊關衿珮
何珊珊李桓既雜遝陳杜相後先自從塵師席強顏僚
窠後但恐賢路妨齏鹽甘所受敝裘雪霜裏孤燈風雨
中芳顏日凋謝老醜形青銅故山渺東溟無由賦歸去

骨肉不在眼夢寐常相晤昨朝鄉人來語我消息真喜
汝兄及弟幸與詩書親富貴果何物有隆還有替譬若
風中花時去即憔悴惟有積善者不啻日晷長雖然猝
難見後嗣綿綿昌我願汝等賢背惡力趨善立德須象
先行道毋憚遠橋門適公退掩關綴新詩話言固覲縷
庶寫長相思

寄幻泊上人

束髮弄文翰鞠明仍究曛汨此塵俗囂至道殊未聞凡

緣如蜩毛擾擾集幻身疇能超物表悠然樂清真夜對
靈谷月曉踏長干雲所思在咫尺可望不可親孤懷日
已委一見自足陳終當重相過共說無生因

簡無為張真人

昔在旃蒙歲曾作清都遊尋幽探祕窟采真訪仙儔
徜徉南華館宿留耆山陬話語幸相洽契誼殊已投既下
陳公榻又買潯陽舟別來忽三載萍跡等浮漚聖皇啟
文運萬國朝冕旒雙鳬忽來集劒影輝斗牛握手烏衣

巷騁目白鷺洲重逢動深慨情意何綢繆

題墨竹

娟娟盈尺素誰寫凌雲姿長梢拂霄漢羣鳳來參差坡
仙久已往湖州不復追高公有清致醉墨何淋漓

送匡廷憲僉事之任閩中

靈雨下神皋春意溢皇都有客獨持斧出莅閩粵區繡
衣炫晴旭驄馬馳遠途行矣勿遲留疲癯望來蘇

陪衍聖公宴集用鄭助教韻

名教心夙歆束髮知所宗鑽瞻慨才劣出處忻時雍載
惟素王道萬古天日崇欲語諒難名蕩蕩宇宙充睠茲
神明胄執德全天衷由來服庭訓髣髴良且恭橋門多
士集華宴一笑同倡賡託神契酬酢熙春融願言極茲
樂嘉會難屢逢

送磐石張先生還蜀

身居學省中心馳千萬里存養豈無方所念在知己憶
與子托交情親若兄弟一旦成睽違此懷何日已浮雲

起半山陰停鳳臺趾於我豈無關見之良足喜山川極
悠邈日月迅流晷努力赴脩程去住各有指目送隔崇
墉攬涕不能止人生大化內離合固難擬雲萍會有期
皓首以為俟

送司業張先生代祀宣聖

聖皇嗣丕祚舉禮秩無文幽明既盱蠻大小齊駿奔況
茲曲阜宅巍巍闕里尊神靈儼斯萃於焉致明禋肅將
豈無人顧屬耆德臣精誠冀有托達此皇意惇軺車戒

遠道宴餞及良辰
雲山渺東魯歸途春正殷

和高學士賀慶成詩二十韻

鳳歷啟文運
天心眷皇明
聖人嗣宸極
君子揚王庭
深仁被八埏
至德浹羣生
民情盡敷洽
穹厚垂休徵
稽文舉殷禮
遍秩及百靈
胞翟且顯若
小大懷至誠
瑟彼瓚實鬯
苾矣黍在盛
綴兆萬舞舉
抑按簫韶鳴
濛鴻感肝鬲
歲蕤絢光晶
灌注既下格
煮蒿隨上升
維時夜初午
斗柄中天橫
令儀雖且肅
睿情悅以寧
孰謂神道遠
孚

假如應聲雲駟倏回馭鑾輿亦旋旌駿奔百辟走慶成
列千卿祥烟擁仙仗天香霽餘馨侃侃玉堂仙當代稱
才能顯相秉明德有事斯為榮倡酬紀盛典攜抑如不
勝蕪詞謾貂續願言祝皇齡

竹窻小隱為羽士孔德容賦

嘉種分淇澳靈根毓清都子孫既繁衍枝葉何紛敷羽
人抱高志淡泊宗玄虛開窻翠靄入展席晴雲舒晝閒
寂無事寶篆銷金爐手持長生訣心味靈筌書清風滿

廣座明月來鳳雛何時解羈鞅一造雲巢居

春暉堂為吳興魏弁作

勾芒一司令旭日明初陽冲融著大出昭甦被羣芳仰
惟亭毒意化育固其常洪纖囿機巧厥德何洋洋東吳
有孝子慈親壽且康白髮被兩髻報答慙無方喜懼激
衷懷春暉署高堂持此寸草心偃仰存羹牆

柏臺餘思為陸廣平御史作

柏臺有君子衷懷孰能知朝伸澄清志夕起追慕思所

思何以見感此柏上烏烏雛未能飛烏母每哺之一朝
雛遠舉返哺答母慈人生亦奚為成此長別離嚴親掩
重泉欲見杳無期尚幸有阿祖遠在天一涯得祿弗得
養痛此烏不如聞之重予感泣然雙淚垂作詩寫子悲
於焉寄吾私

重慶堂為廖以成作

西川廖氏子樂育居成均口言重慶事積善由其門阿
翁已見曾其子亦抱孫一堂萃四老油然樂天倫白髮

照先後斑衣舞逡巡譬彼凌雲木厥盛由本根又若大
江水其流自淵源廖氏集繁祉積累既有因作詩紀斯
美庶勸薄俗敦

繼志齋集卷二